

Sarah Quita Offringa a competi den tres disciplina di PWA Windsurfing World Tour 2014



ORANJESTAD – Sarah-Quita Offringa a cuminsa desde dia 20 di juni competi den e PWA Windsurfing World Tour 2014. E aña aki e ta competi den tres disciplina cu ta Freestyle, Ola y Slalom. Como preparacion e ta yega Aruba fin di april pa train fisicamente den gym cerca Aldrick Maduro y ariba lama na Barcadera y Fisherman's Huts hunto cu su ruman homber Quincy.

Den e PWA copa mundial na Boneiro e ta logra titula campeon den freestyle. Siguiendamente e ta biaha pa Islas Canarias (España) unda na Gran Canaria e ta participa den Ola. Esaki ta realmente e prome competencia di ola cu Sarah-Quita ta participa aden ya cu aña pasa no tabata tin biento na Pozo. Den prome buelta den e ultimo manga di e single eliminacion e dos campeon mundial esta Daida den Ola y Sarah-Quita den Freestyle y Slalom tin cu en-

frenta otro. Sarah-Quita no ta pasa pa e segunda buelta y pa falta di biento e dobel eliminacion ta keda cancela tambe. Sarah-Quita ta finalisa na ultimo luga na Pozo.

Fuerteventura ta e siguiente stop pa freestyle y e nivel di e muhenan ta halto pero no suficiente pa tumba Sarah-Quita di e prome luga ariba podium cu e ta domina desde aña 2008 sin perde un manga. Cu e dos evento di freestyle Sarah-Quita ta titula campeon mundial den freestyle pa di 7 biaha sigui Tenerife tin condicionnan di biento y ola cu ta bentahoso pa e disciplina di Ola. Atrobe den e single eliminacion, den e se-

gunda buelta Sarah-Quita tin cu enfrenta e campeon den Ola Daida. No obstante tur e contra tempo, Sarah-Quita ta mantene un mente fuerte cu su bista dirigi ariba e dobel eliminacion, unda e tin oportunidad di subi y mehora su posicion. Su deseo ta cristalisa ora cu diahuebs e ta cuminsa competi desde 10'or di mainta te cu 19:30 di anochi y ta pasa den 5 manga cu victoria unda cada manga tin un duracion di 15 minuut.

Den e di cuater manga e ta nabega den seco y ta dal den baranca y ta daña su fin y tin cu sali for di lama pa busca un schroefdraai pa drecha su fin. Entretanto su contrin-

cante ta acumula punto pero ta sufri e mesun mala suerte riba baranca. Sarah-Quita no ta perde pa gana y ta proba di tira un triki halto cu ta saca un score halto cu ta pone bek den competencia y ta gana e manga #4.

Diabierna mainta tempran e ta nabega 3 manga lagando e Aleman Stefi Wahl y e Hulandes Amanda Beenen pafo di e podium, un luga cu nan tabata ocupa. Den e di 8 manga Sarah-Quita tin cu enfrenta Daida atrobe.

Aki e ta duna tur cu tin pasobra rindi no ta un opcion. E ta demostra cu e ta un forsa cu bo no por descarta den futuro. Sarah-Quita ta feliz cu e meta el a propone di yega, esta pa ta para ariba podium cu bandera di Aruba. Un soño cu ta bira realidad. E menasa pa e Moreno Twins Daida y Iballe ta bek den persona di Sarah-Quita. E siguiente reto ta den slalom na Alacati, Turkia.

Pa mas informacion check-
www.pwaworldtour.com
www.continenteven.com
www.boardseekermag.com
y www.sarah-quita.com FB Sarah-Quita Offringa ARU 91 Athlete. □